

1
page 20

REGALE DE CAHORS,

Pour Maistre Louys Germain, Bachellier en
droict Canon, Archidiacre en l'Eglise de
Cahors demandeur en Regale,

*Contre Maistre Anthoine de Vertamont, indultai-
re & Maistre Guillaume Carbonnel resigna-
taire defendeurs.*



E trois qui disputent l'Archidiaconé
de Cahors il eschet premierement d'ex-
clure Maistre Anthoine de Vertamont,
lequel estant indultaire est obligé de
monstrer vne vacance par mort, l'in-
dult n'ayant lieu qu'en ce cas là. Or par
la production de Carbonnel, il apert
que le benefice est vacquant par resigna-
tion, & par consequent ledit sieur de
Vertamont n'a pas vn ombre de droict seulement.

La contestation estant entre Carbonnel & le demandeur
deux choses sont à examiner, la premiere si l'Euesché de Cahors
est subiet à la regale, la seconde, en cas qu'il y soit subiet, si lors
de la resignation faicte en faueur dudit Carbonnel par son On-
cle, il y auoit ouuerture en l'Euesché de Cahors, & de ces deux
questions depend absolument la decision du diferent d'entre
les parties.

Pour le iugement de la premiere, le Roy & nos Seigneurs de
son Conseil sont tres-humblement suppliez de considerer quel-
le est l'origine de la ville de Cahors, de quel temps elle est incor-
poree au Royaume, comme elle en est sortie, & comme elle y
est rentrée, pour ce que cela sert grandement à la decision de
cette question.

Après la mort de l'Empereur Theodose, Stilicon ayant
appellé à son secours les Vandales, & les Goths, il se

trouua à la fin que ceux qu'il auoit appelez prirent part dans la defroute de l'Empire, & lors il se trouua que Tholouse fut establie pour estre la principalle ville du Royaume des Goths, mais du temps de Clouis, Alaricq Roy des Goths ayant esté desfaict toute l'Aquitaine fut reünie au Royaume de France, comme vne terre legitiment acquise sur vn veritable ennemy, depuis sous Chilpericq Cahors, ayant esté donné en douaire à sa femme, dès ce temps là, & depuis sous Clotaire & Dagobert toute l'Aquitaine tourna sous le gouvernement & la principauté d'un seul, & ce faisoit appeller Duc d'Aquitaine.

Sous le Reigne de Charlemagne Hunold Duc d'Aquitaine ayant esté desfaict toute la Prouince fut diuisee en diuerses Comtez, & de là sont venus les Comtes de Tholouse, ausquels la ville & Euesché de Cahors estoient subiects, & cette Prouince est demeuree en Comté iusques en l'an mil deux cens vnze que Reimond cinquiesme Comte de Tholouse, s'estant empesté de l'heresie des Albigeois, le Pape Innocent troiesme l'excommunia deschargeant ses subiects du serment de fidelité, incita le Roy Philippes second d'armer contre ledit Reimond Comte de Tholouse qui enuoya Louys son fils avec vne puissante armee, à la faueur duquel, Guillaume quatriesme de la maison de Cardaillac Euesque de Cahors se retira de la subjection des Comtes de Tholouse, se rendit Maistre de la place, & pour autoriser ce qu'il auoit faict, il obtint lettres patentes de Philippes second, par le moyen desquelles il rendit le Comte de Cahors comme vn fief mouuant de ce Royaume, en fit la foy & hommage en ayant esté inuesty par le Roy, par lesdites lettres patentes. Depuis en l'an mil deux cens quatre vingts & vnze, Reimond, premier Euesque de Cahors se mist en la protection particuliere du Roy, & pour cet effect accorda Pariage par le moyen duquel le Roy eut moitié dans les domaines & droicts dependans du Comté avec la souueraineté dudit Comté, & depuis ce temps, les Euesques de Cahors sont demeurez Comtes, partageans la Iustice avec le Roy dedans la ville, sont obligez de faire la foy & hommage à chasque mutation, comme en effect tenans ledit Comté par la grace & par le bien faict des Roys de France.

Voila pour ce qui regarde l'estat de la ville de Cahors, & des

diuerſes mutations qu'elle a receuë.

Quant au Chapitre, de leur fondation, c'eſtoient Religieux portans habit noir, & ſont demeurez en cét eſtat iuſques en l'an mil deux cens cinquante, qu'un Barthelemy Eueſque de Cahors, du conſentement du Pape Innocent III. ſeculariſa leſdits Religieux, & depuis ce temps ſont demeurez Chanoines au lieu de Religieux.

De toutes ces remarques il ſe tire vne conſequence, que ſi en quelque Eglise de France la regale doit auoir lieu, c'eſt en l'Eglise de Cahors, puis que l'Eueſque ne tient ce qu'il poſſede que par la grace & par le bien-fait des Roys.

Que ſi iuſques en l'an mil deux cēs cinquāte la regale ſpirituelle n'a point eſté pratiquée, la raiſon en eſt bien prompte, pource que n'y ayant point de prebende, ains des places de Religieux, ces Preſtimonies n'eſtoient point ſujettes à la regale, pource que ce n'eſtoient point benefices : mais depuis ayans eſté faits benefices par la ſeculariſation, dés ce temps-là ont eſté ſujets à la regale. Et ne ſert de dire que le Roy n'ayant point droit de regale, *à fundatione*, par la ſeculariſation il ne la peut pretendre; puis qu'il ſe voit le contraire pour Luçon dont le Chapitre eſtant compoſé de Chanoines, qui auparauant eſtoient Religieux ne laiſſe d'eſtre ſujet à la regale : & la raiſon de cela eſt remarquée par Monſieur Ruſé au priuilege huiſtième, où il diſt, *quod non inſpicitur quod in primitiua Eccleſia fundatum eſt, quando poſtmodum alternatus eſt ſtatus Eccleſie per quadraginta annos: & tunc preſens ſtatus eſt inſpiciendus* : & cite à ce propos le Chapitre, *cum de beneficio de prebendis in ſexto*. Panorme ſur le chapitre *dilectus Clement. 2. de prebendis*, Oldrade au Conſeil 55. ainſi pour ſçauoir ſi vn legataire eſt capable de receuoir ſon legts, l'on ne conſidere point *tempus inſtrumenti, ſed tempus mortis*, en la loy *mortis cauſa*, au ff. *de donatio cauſa mortis*, en la loy, *non intelligitur*, au S. *quando de iure ſiſci*. Par ſes raiſons les Religieux ayans eſté ſeculariſez, les prebendes que l'on a créées ont eſté rendues ſujetes au droit de regale.

Pour pretendre par les defendeurs que l'Eueſché de Cahors ſoit exempt de la regale, il faut qu'ils communiquent & qu'ils iuſtifierent titres d'exemptiō, & encores que ce titre ſoit onereux, & que le Roy en accordant cette exemption aye eſté recompen-

fé en autre chose : car lon ne peut pas dire pour Cahors ce que lon a dit pour la Prouence & pour la Bretagne, qu'estans subjets aux Comtes de Prouence & Ducs de Bretagne, ils estoient venus sous la domination Françoisé à des conditions certaines, lesquelles il ne falloit point outrepasser : que leur condition ne deuoit point estre pire pour estre venus sous vn meilleur Empire. Car pour Cahors depuis la diuision de l'Empire elle a esté du Royaume : que si par entreprises & vsurpatiōs elle en a esté pour quelque temps soustraite, elle est retournée *iure postliminij*, au mesme estat qu'elle estoit auparauant, a repris les mesmes qualitez qu'elle auoit auparauant qu'elle eust esté vsurpee : De sorte que l'Euesque ne tenant le Comté que de la gratification du Roy, il est dans le droit commun, & faut qu'il iustifie l'exemption par escrit, pour faire perdre au Roy ce droit auguste & eminent de la Couronne.

Or les defendeurs ne communiquent aucune exemption, mais veulent pretendre que le Roy a perdu son droit, *per non usum* : Que les Euesques ont prescript ce droit de regale, & par consequent qu'au iourd'huy lon vient à tard pour le demander. cette proposition est vne heresie d'estat : & le demandeur ne sçait pas comment il se trouue vn François si hardy de tenir cette proposition dans le Conseil du Roy : c'est estre ennemy des Roys & de la Couronne d'auoir ce sentiment, puis qu'il est vray que c'est vn des plus nobles fleurons d'icelle ; il s'ensuit qu'il est inalienable, incessible & imprescriptible, le temps n'y peut apporter aucune alteration : car comme la regale spirituelle est vne grace que le Roy fait à ceux qui le requerent, seroit-il dict que le Roy perdrait son droit à faute d'auoir esté requis ?

Il faut donc voir sur quelles raisons & sur quels moyens les defendeurs veulent autoriser leur pretenduë exemption. Ils disent que par l'Ordonnance *dum Episcopus*, il est dict precisement *ubi dominus rex habet regaliā*, & par l'Ordonnance de Louys XII. de l'an mil quatre cens quatre vingts dix-neuf, il est defendu aux Officiers du Roy de se mettre en possession des Archeueschés, Eueschés & Abbayes esquelles le Roy n'a aucun droit de regale, & par l'Edict de l'an mil six cens six, verifié en Parlement en l'annee mil six cens & huit, il est dict que le Roy n'entend iouir du Droit de regale, sinon en la mesme forme que

que ses predecesseurs, & luy en ont faict, sans l'estendre plus auant au preiudice des Eglises qui en sont exceptees, par toutes lesquelles Ordonnances il s'enfuit que le Roy n'a point la regale vniuersellement dans tout son Royaume, & qu'il y a des Eglises qui en sont exceptees; mais ce point n'est point contesté. Lon demeure d'accord avec les defendeurs qu'il y a des Eglises qui sont exceptees, mais la proposition qui est à prouuer est que Cahors soit au nombre desdittes Eglises exceptees.

La preuue que les defendeurs alleguent de leur faict se tire du registre de la chābre des Comtes au liure cotté par ces mots, *qui est in cælis*, dans lequel registre il est dict que le Roy a droict de regale *in tota prouincia Bituricensi, exceptis Lemouicensi & Caturcensi*; D'où il tire cette consequence que le Roy a recogneu n'auoir point de droict de regale en l'Euesché de Cahors: mais la responce à cette obiection qui est tres-forte est que ce registre n'est pas veritable. Car pour exemple il met que Limoges est exempt de la regale, & neantmoins le demandeur produict vn Arrest de l'an mil deux cens soixante & douze tiré du registre *olim*, par lequel il se veoit que le Roy a droict de regale à Limoges: le Seneschal de Perigord ayant faict saisir les fruiets de l'Euesché de Limoges l'Euesque estant mort, & entre lesdits biens deux mestairies, Vicecomes Combernienfis, vendiqua lesdites deux mestairies comme estans de son propre & n'estans point du Domaine de l'Euesché, & par Arrest ayant iustifié sa possession il fut monstre comme le Roy iouïssoit du reuenu de l'Euesché à cause de la regale. Il est donc vray de dire que dés l'an 1272. Limoges y estoit subiect, & par consequent le registre de la chambre des Comtes n'est pas veritable & considerable, puis qu'il le met au nombre des Eglises exemptes.

Le mesme registre dit qu'en l'Archeuesché de Tours la regale y a lieu fors aux Eglises situees en Bretaigne, & neantmoins le demandeur iustificera qu'à Nantes, Vannes, & Leon la regale y a lieu, ainsi iugé par Arrests solempnels qui seront produits.

Ledit registre dict encores que dans le Languedoc & la Prouence la regale n'a point de lieu, & neantmoins le demandeur iustificera comme le Roy est en possession de la regale dans lesdits pays par les traictez & compositions que les Euesques desdites

Eglises ont faictes avec les Tresoriers & Chanoines de la sainte Chapelle. Par toutes ses considerations il se veoit combien lon doit peu adiouster foy à ce registre, & si c'est vn tiltre legitime d'exemption.

S'il en faut croire Monsieur le President le Maistre, apres auoir remarqué diuerses faussetez dans ce registre, il conclud son Chapitre par là: Il s'ensuit qu'il ne faut adiouster foy audit registre de la chambre des Comtes pour ce qu'il n'est en tout veritable. Cette lumiere de son siecle qui auoit vne intelligence particuliere des droicts de la Couronne ayant remarqué & veu les faussetez qui estoient dans ce registre qui ayant esté mis en vn temps auquel l'ignorance empeschoit que lon ne cogneust quel estoit ce droict auguste, enquoy il consistoit & pourquoy le Roy l'auoit, ils l'ont donné seulement sur quelques Eueschez quoy que le Roy fust fondé *in vniuersum*, & tel registre a esté iugé si peu considerable que pour Limoges pour toutes les Eglises de Bretagne, pour les Eglises du Languedoc lon n'a pas laissé d'adiuger la regale au Roy, ce registre ne luy pouuant preiudicier.

La seconde response est, que ce registre ne doit estre entendu que de la regale temporelle & non pas de la spirituelle. Et pour le monstrier les termes sont considerables, *Dominus rex prout constat per antiqua scripta camera consuevit capere regaliā cum vacauerit*: par lesquels mots *consuevit capere*, lon ne peut dire autre chose, sinon que lon entend parler de la regale temporelle, qui se prend & qui se leue, pource que lon poursuit les fruićs, mais non pas de la regale spirituelle, en laquelle au lieu de prendre le Roy donne & confere. Et pour le monstrier encores plus clairement dans le mesme registre, il est dict plus bas, *in prouincia Burdegalensi solum, verumtamen de Pictauiensi, fuit computatum, anno 260.* par lesquels mots, *fuit computatum*, il est sans reплика qu'il entend parler de la regale temporelle, dont lon compte à la Chambre des Comptes, pource que de la regale spirituelle il ne s'en fait aucun compte. Tel est l'aduis de Monsieur le Maistre en son traicté des regales au chapitre quatriesme, où il explique ce qui peut estre de ce registre, & tient affirmatiuement qu'il ne peut estre entendu que de la regale temporelle, & non point de la spirituelle.

Aussi est-il vray qu'en l'Eglise de Cahors le Chapitre a pretendu la descharge de la regale temporelle en consequence d'une concession ou ordonnance de Philippes II. Roy de France : car apres la mort d'un Euesque le Seneschal de Perigueux ayant fait saisir les fruiets del'Euesché, le Roy fit donner main-leuée de cette saisie en l'an mil deux cens soixante & dixneuf sur la concession qu'il disoit auoir des droicts du Roy pour le temporel seulement. Et ce voit par les lettres patentes (dont copie sera produite) que le Chapitre n'a pretendu que la regale temporelle & non point la spirituelle. Ce n'est pas que si Messieurs de la Sainte Chapelle vouloient disputer & contester qu'ils n'y fussent bien fondez : d'autant que la concession de Philippes II. ou de Philippes III. come lon voudra estoit fort bonne pour son reigne, mais ne pouuoit pas aliener au prejudice de ses successeurs, comme le Roy Louis le Jeune, ayāt accordé en l'an mil trois cēs sept à l'Archeuesque de Bordeaux, tant pour luy que pour ses Suffragans l'exemption de la regale, en consideration de ce que l'Archeuesque de Bordeaux auoit fait son mariage avec la fille de Guillaume Comte de Guyenne : neantmoins cette exemption a esté bonne pour le temps dudit Roy Louis le Jeune, mais elle n'a rien seruy à ces neuf Eueschez Suffragans, lesquels aussi bien que leur Metropole sont demeurez subjets audit droict. Et pour le monstrier le demandeur produit vn arrest, par lequel on a iugé qu'Angoulesme estoit sujet à la regale : quoy que ce soit vn des Suffragans de Bordeaux, Ainsi toutes les autres remises prouuées par Chopin au liure second, *de dominio*, titre neuf, nombre huiet, n'ont point esté iugees considerables : & nonobstant icelles lon a adjugé la regale au Roy, pour ce que c'estoient concessions liberales & sans charge, & par consequent n'obligeoient point les successeurs à l'entretenir.

C'est la raison pour laquelle les Tresoriers, Chanoines & Chapitre de la Sainte Chapelle, nonobstant ladite pretendue concession, ne laissoient d'estre fondez à pretendre la regale temporelle, puis que cette concession est faite sans cause. Et comme le Chapitre de Langres ayant diuers priuileges & exemptions confirmez de temps en temps, n'a pas l'aissé de perdre le droict qu'il auoit de iouir des fruiets, *sede vacante*, par vn arrest solemnel qui sera produit; Ainsi les Tresoriers Chanoines de la Sain-

ete Chapelle peuuent esperer que nonobstant lesdits priuileges & concessions l'Euesché est subiet à la regale temporelle aussi bien qu'à la spirituelle.

Mais pour terminer ce poinct tout à fait, apres l'arrest de la Cour de Parlement du vingt-quatriesme Auriil mil six cens huiet, rendu pour l'Euesché de Bellay, il n'y a plus lieu de disputer au Roy son droict de regale: car lon soustenoit que Bellay estant de la Bresse de nagueres vnue à la Couronne par le traicté du mois de Ianuier mil six cens vn Suffragant de Besançon, qui n'estoit & qui n'auoit iamais esté subiet à la regale: Neantmoins ce celebre Parlement de Paris, qui maintient si puissammēt tous les droicts de la Couronne, iugea suiuant les conclusions de Monsieur l'Aduocat General Seruin, que Bellay estoit subiet à la regale comme tous les autres Eueschez de son Royaume, avec inhibitions & defenses aux Aduocats & Procureurs de faire aucune proposition au contraire: & quoy que quelques ignorans du siecle ayent trouué mauuais cette forme de prononciation, qui ennemis de l'autorité Royale, estans encores infectez du poison de la ligue, ont eu plus de soin de diminuer la puissance des Roys pour la transferer à des puissances estrangeres, qui n'anticipent que trop sur les libertez de l'Eglise Gallicane: Neantmoins il est tres-vrai que cette prononciation ressent de la dignité & de la Majesté d'un celebre senat. Ainsi il se veoit dans le *Ioannes Galli* en la question quatre vingt neuf tout à la fin vne prononciation pareille: *Fuit prohibitum ne de cetero aliquis proijceret nisi partes principales & quod aduocati non consulerent de cetero contrarium*. Le mesme se trouue encores en la question quarante six, & en la question cent soixante & huit *Aufrer*. en la decision soixante & quatorze.

Ceux qui veulent mal au Clergé de France, ont voulu faire croire mal à propos qu'ils s'estoit plainct de cet Arrest, comme si leur qualité d'Ecclesiastiques les rendoit ennemys de l'autorité Royale, & comme si la liberté que le Roy leur donne de deputer des agents, deuoit seruir pour aneantissement des droicts de sa Couronne. C'est leur faire vne iniure d'auoir cette opinion d'eux, & de croire qu'ils sollicitent contre la regale. N'est-il pas plus vtile & plus honneste au corps du Clergé de recevoir des gratifications de son Prince, que d'une puissance estrangere?

estrangere? N'est-il pas plus vtile à sa porte d'obtenir des prou-
visions en regale que d'aller chercher du plomb à Rome? n'est-il pas
plus important à tous François, outre le transport de l'argent de
reconnoistre le Roy pour son Seigneur souuerain, & de conser-
uer ses droicts que de les auilir pour esleuer ceux d'autrui? Il
n'est donc pas vray que le Clergé en corps par ses Deputez em-
pesche que le Roy ne soit vniuersellement recogneu dans son
Royaume. Et comme il est aussi bien souuerain dans Cahors que
dans Paris, il doit aussi bien auoir dans l'un que dans l'autre le
droict de regale. Serat il dict que le Roy perdra vn droict si au-
guste sans que lon luy communique comment il s'est desparty
de son droict, & comment il l'a perdu? Lon recognoist qu'il est
fondé *in vniuersum* en tous les Eueschez de son Royaume à
auoir la regale, qu'il y a des Eglises exemptes, mais que c'est par
priuilege & par concession des Roys à tiltre onereux. Si donc
Cahors se pretend exempt, il faut qu'il montre son exemption,
& faute de la faire apparoir il doit estre iugé par le droict com-
mun: il est dans la reigle s'il ne montre, & s'il ne iustifie qu'il soit
dans l'exception. Au contraire le demandeur faiet veoir, quoy
qu'il n'y fust point obligé, que Cahors n'a iamais pretendu que
la regale temporelle. Lon ne luy pouuoit pas accorder la spiri-
tuelle: pour ce que lors il n'y auoit aucuns benefices crees subjects
à la regale. Toutes les Chanoinies & dignitez de l'Eglise estoient
en regale: & n'ont esté secularisez que depuis, de sorte que
d'exemption ils n'en peuuent pretendre, & par consequent la
regale y doit auoir lieu.

Et ne peuuent pas les defendeurs prendre aduantage de la
retention faiete au Conseil pour iuger le principal: car encores
qu'il soit vray que dans le Parlement de Paris où les questions
de regale doiuent estres iugées & terminées, il ne se fust trouué
aucune difficulté pour conseruer au Roy son droict de regale:
le demandeur a cette confiance que le Roy ne perdra point sa
cause dans son Conseil. Il faut faire tousiours difference entre
les causes du fisque & les causes du Roy. Les causes du fisque
sous vn Prince comme celuy qui regne heureusement sont
tousiours peu fauorables, les Roys aimans mieux perdre que
d'appauvrir leurs subjects. Mais quand il s'agit des droicts de
la Couronne, vn sujet est meschant qui les dispute, & la
cause n'en peut estre trop fauorablement embrassée par ses

10

officiers : puis que de la conseruation de la dignité Royale en toutes ses parties resulte la manutention du repos particulier & public.

Ce n'est pas assez d'auoir faict veoir que Cahors n'est point exempt de la regale spirituelle, il faut monstrier que lors & au temps que Maistre Anthoine Carbonnel Oncle à resigné l'Archidiaconé contentieux au demandeur, lequel en consequence de la resignation à luy faicte, s'en est faict pouruoir en Cour de Rome, l'Euesché de Cahors vaquoit en regale, & au Roy seul appartenoit la collation des prebendes & dignitez dudit Euesché.

Lon demeure d'accord que Maistre Pierre Habert lors Euesque de Sidon & coadiuteur dudit Euesché de Cahors a seruy le Roy à la Messe, & qu'il a faict en personne le serment de fidelité qu'il estoit obligé de faire le vingt Auiril mil six cens vingt cinq : mais ce n'est pas assez pour fermer la regale qu'un Euesque face le serment de fidelité. L'Ordonnance *dum Episcopus*, & en consequence tous les Arrests l'obligent d'obtenir lettres Patentes adreßantes à la chambre des Comtes de Paris, par lesquelles il leur est mandé d'enregistrer le serment de fidelité de l'Euesque, & en consequence d'iceluy donner main leuee des fruiçts saisis, & ledit Arrest de main leuee, ensemble le serment de fidelité, ou doit estre signifié au Receueur du Domaine, ou enregistré en la Iustice royale du lieu ou est situé l'Euesché, & iusques à ce que toutes ces formalitez ayent esté obseruees, l'Euesque ne peut conferer aucun benefice, ny le Pape, les collations appartiennent au Roy seul. C'est la decision expresse de Monsieur Ruzé au cinquante huiçtiesme priuilege, de Probus en la question troisieme & cinquante troisieme, de Monsieur le Maistre, en son traité des regales au chapitre cinquiesme. Doncques de reuocquer en doute cette proposition c'est estre absolument ignorant au faict des regales.

Il y a eu des ignorans qui ont voulu pretendre que le seul serment de fidelité faict entre les mains du Roy suffisoit pour fermer la regale, comme en matiere feodalle la foy & hommage prestee au Seigneur, empesche que le Seigneur ne puisse faire les fruiçts siens depuis la foy & hommage : mais le mesconte qu'il y a est que le serment de fidelité n'est point parfaict pour valloir

foi & hommage qu'il ne soit venu à la cognoissance des officiers du Roy & qu'il ne soit enregistré, & cela afin que le nouvel Euesque soit mis en possession de son Euesché par les officiers du Roy. Ainsi il se veoit au Canon *Adrianus sexagesima tertia distinctione*: ou parlant des inuestitures des Euesques, il est dict: Jusques à ce que l'Euesque soit inuesty de son Euesché par le Roy il est defendu à ses confreres de le consacrer. Et cette possession n'est point accordée par le Roy, mais par ses officiers. Dequoy *Ioannes Andreas* aux additions sur le *Speculator* au titre *de legatis* au §. *nunc. tractemus, versiculo, sed nunquid legatis*, dict que, *rex Francia in hoc habet privilegium quod Prelati sui regni accipiunt temporalia per manus suas*, ce qui est repeté au chapitre *Generali de electione in sexto*. Il faut donc auparavant qu'un Euesque se puisse dire tel, qu'il en puisse faire les fonctions, recevoir les fruits, & entre iceux la collation des benefices, qu'il soit mis en possession de son Euesché par les officiers royaux.

Et cette maxime est si veritable, que la question s'en estant presentee pour le regard de l'Euesché de Leon, duquel l'Euesque dès l'annee mil six cens treize auoit fait le serment de fidelité au Roy, l'auoit fait enregistrer en la Chambre des Comptes de Nantes, en consequence des lettres patentes du Roy: Toutefois la cause ayant esté traictee audit Conseil & renuoyee au Parlement, par Arrest du dixhuitiesme Avril mil six cens vingt-quatre, faute d'auoir fait par l'Euesque enregistrer son serment de fidelité en la Chambre des Comptes de Paris, & obtenu mainleuee de ladite Chambre, la regale fut declaree ouuerte, & par un reglement general, afin que lon ne doubtaist plus de la question. Il est dict que la regale ne pourra estre clause que les Euesques ne rapportent le serment de fidelité au Roy, enregistré en la Chambre des Comptes de Paris, avec la mainleuee de ladite Chambre des saisies des fruits: apres lequel Arrest, qui n'est que l'explication de l'Ordonnance ce seroit abuser de la patience du Conseil de s'arrester dauantage en la preuue de cette maxime.

Contre laquelle maxime generale lon oppose vn Arrest que lon dict auoir esté rendu le onzieme Avril mil six cens vingt-huit, sur les conclusions de Monsieur l'Aduocat General Ta-

lon: par lequel pour l'Euesché d'Angers lon dict auoir este iugé que le seul serment de fidelité suffisoit sans l'enregistrement en la Chambre des Comptes, & sans la main-leuee des fruiçts. Et sous pretexte que cét Arrest est mal dressé, ou lon a fait parler Monsieur Talon l'Aduocat general vn langage contraire à ses sentimens, & aux propositions qui auoient esté tenuës en l'annee mil six cens vingt quatre lors de la Contestation pour l'Euesché de Leon, lon voudroit aujourd'huy se seruir de cét Arrest pour renuerfer les maximes les plus certaines de la regale.

Mais pour monstrier que ce qui est inseré dedans le plaidoyé de Monsieur l'Aduocat General Talon n'est pas ce qu'il a plaidé; Le Conseil remarquera, s'il luy plaist, que dès l'an mil cinq cens quatre-vingts-huict, Messire Charles Miron a esté pourueu de l'Euesché d'Angers, à la nomination du defunct Roy Henry III. il en a fait le serment de fidelité le vingt-septiesme iour de Septembre de la mesme annee, obtenu lettres patentes le *premier* *jour d'août* *1588* ensemble Arrest en la Chambre des Comptes, portant enregistrement & main-leuee en datte du *xxviij* *septembre* *1588*. Lon suppose donc que Monsieur l'Aduocat General aye plaidé ce qui n'estoit pas, puis que lon dict qu'il n'a point fait enregistrer son serment de fidelité, & l'Arrest de la chambre des Comptes est produict, portant son enregistrement & sa main-leuee. Quand donques l'Arrest de 628. est interuenue, ce n'a pas esté sur la question de sçauoir si le defect d'enregistrement du serment de fidelité, faisoit ouuerture à la regale ou non, c'est vne maxime trop triuiale & trop certaine dans le Parlement: & puis que lon rapporte le serment de fidelité de Monsieur Miron enregistré il y a plus de quarante ans pour l'Euesché d'Angers, estant mort le Doyen des Euesques de France, il ne peut pas tomber sous le sens commun que lon aye contesté ce poinct, dont la preuue est si certaine & si concluante, veu mesmes que dans l'Arrest il n'est point parlé de ce qui auoit esté iugé pour Leon en la mesme questiõ quatre ans auparauant; ce que lon n'eust pas obmis si ç'eust esté le poinct important de l'affaire, mais la contestation alloit sur vn autre poinct. Car Monsieur Miron en l'annee mil six cens seize, ayant fait diuorce avec son Eglise d'Angers, & s'en estant démis en faueur de Monsieur de la Varenne; depuis Monsieur de la Varenne estant

ne estant decedé, le Roy ayant trouué bon que Monsieur Miron se remist & se restablir avec son Eglise; il fut vne autre fois pourueu de l'Euesché en l'an mil six cens vingt-deux: & lors bon disputa si par le moyen de ce reestablissement il estoit obligé faire nouveau sermēt de fidelité, & obtenir nouuelles lettres patētes. C'estoit la question qui estoit à iuger, en laquelle toute la defense de ceux qui empeschoient la regale, fut de dire que l'Episcopat estoit vn mariage spirituel entre celuy qui estoit consacré Euesque & l'Eglise qui luy estoit ordonnee de desseruir: que quand il l'abandonnoit c'estoit vn diorce qu'il faisoit avec son espouse legitime: que si par fortune il estoit rappelé à la mesme Eglise, *redintegratum erat matrimonium*, & ainsi tout ce qui s'est fait pendant le temps du diorce s'éuanouissoit & n'estoit pas considerable, & les choses estoient presumees estre au poinct qu'elles estoient auparauant qu'il eust diuerty, suiuant cette belle loy troiesme, *de pactis dotalibus: Pacta conuenta, quæ in diuortij tempus collata sunt, redintegrato matrimonio locum non habent*: Qu'ainsi quand Monsieur Miron auoit esté redonné à son Eglise, il estoit presumé n'en auoir iamais diuerty: & pour cette raison n'estoit ny obligé à nouveau serment, ny à faire aucun enregistrement à la chambre des Comptes, & suffisoit qu'une fois pour la mesme Eglise il eust satisfait à toutes les formes prescriptes par l'Ordonnance. Ce furent là les veritables raisons & les motifs sur lesquels fut donné l'Arrest d'Angers de l'an mil six cens vingt-huict, lequel Arrest est conforme à ce qui a tousiours esté pratiqué & iugé en pareille rencontre, & particulierement pour la Prebende Theologale de Constance. La question estoit que pendant les defenses d'aller à Rome, l'Euesque de Constance ayant esté nommé par le Roy, il prit possession en vertu de son breuet, apres auoir fait enregistrer en la chambre des Comptes son serment de fidelité, obtenu main-leuee de la Chambre, laquelle il auoit fait signifier au Receueur du Domaine de Constance. Depuis quelque temps apres la liberté ayant esté d'aller à Rome, ayant obtenu ses bulles, Nicolas Bourgouin se fit pourueoir en regale de ladite Theologale à faute d'auoir fait nouveau sermēt de fidelité par ledit Euesque: & la cause ayāt esté plaidee par maistre Anthoine Mauguin, & maistre Pierre de la Martilliere sur les conclusions de monsieur l'Aduocat

general Seruin, le regaliste fut debouté: d'autant que l'Euesque ayant satisfait vne fois à l'Ordonnance, le serment par luy vne fois presté seruoit & auoit vn effect reproductif au premier, dès le temps duquel, la regale auoit esté clause si tost qu'il auoit esté en registre en la chambre des Comptes. Qui est la mesme raison pour laquelle lon iugea que monsieur Miron Euesque d'Angers n'auoit point esté obligé de faire vn nouveau serment de fidelité n'y le faire enregistrer en la chambre des Comptes, y ayant desia esté satisfait dès l'an mil cinq cens quat re-vingts-huiét. De sorte que de vouloir se seruir de l'Arrest d'Angers, pour induire qu'un Euesque n'est point obligé en quelque temps que ce soit de faire enregistrer son serment de fidelité, c'est contre l'autorité de l'Arrest mesme, & contre la maxime certaine & arrestee dans le Parlement de Paris, qui est le seul lieu où les regales se iugent.

Donques ayant fait voir que l'Euesché de Cahors est sujet à la regale, & que le defaut de serment de fidelité enregistré en la chambre des Comptes fait l'ouuerture en regale: il n'est point difficile de monstrier que le Benefice contentieux a vaqué en regale.

Il est constant entre les parties que le vingtiésme Auiril mil six cens vingt-cinq Messire Pierre Habert a fait le serment de fidelité pour raison de l'Euesché de Cahors. Il est encores pareillement certain que iamais M^r de Cahors n'a fait enregistrer son sermēt de fidelité en la chambre des Comptes, n'a point obtenu d'Arrest de main-leuée: en vn mot n'a point esté mis en possession de son Euesché par les Officiers Royaux; & par consequent à l'esgard du Roy il n'est point en possession, & la regale est tousiours ouuerte. Ce sont les maximes les plus certaines que lon aye au Barreau.

En l'annee mil six cens vingt-sept maistre Anthoine Carbonnel paisible possesseur du second Archidiaconé de Cahors, passa procuration pour resigner ledit Archidiaconé le vingt-neufiesme Mars de ladite annee, & ce en faueur du defendeur son neveu. Et le Conseil remarquera (s'il luy plaist) qu'il n'y auoit que deux ans que monsieur de Cahors auoit fait le serment de fidelité: par consequent aux termes mesmes de l'Arrest d'Angers il n'auoit pas acquis les trois ans de paisible possession dudit

Euesché; Et partant de quelque biais que lon l'eust voulu prendre la regale estoit ouuerte.

Au lieu que maistre Anthoine Carbonnel deuoit resigner entre les mains du Roy en faueur de son nepueu, negligant les droicts du Roy, le defendeur s'est adressé au Pape, a obtenu ses prouisions le vingt-neufiesme Aupil de ladite annee mil six cens vingt-sept, prend son Visa de l'Ordinaire le neufiesme Nouembre, & le seiziesme dudit mois il prend possession, & deux iours apres maistre Anthoine Carbonnel decéde. Or il est certain que la prouision du defendeur estoit nulle, pource que quand la regale est ouuerte il n'y a que le Roy seul qui puisse conferer, *et collatio facta in manibus Pape nihil operatur, et semper vacabit beneficium donec Rex prouiderit*, dit M^r Ruzé en son traitté des Regales, priuilege quarēte-quatre, & cite à ce propos vn Arrest rendu le dixhuietiemes Ianuier mil trois cens quatre-vingts neuf, pour vne Prebende en l'Eglise de Tournay, rendu au profit d'un nommé Philippes des Effarts en vne question plus forte: car ce n'estoit pas seulement vne resignation en faueur qui auoit esté admise par le Pape, mais vne permutation qu'auoit faite vn Nicolas Boigne Chanoine de Paris, avec Jacques Cosson Chanoine de Tournay. Et fut iugé par cet Arrest que nonobstant la prouision du Pape qui auoit pourueu l'un & l'autre des compermutans des Benefices eschangez, la regale de Tournay estant ouuerte, que la prouision accordée par le Pape de la Prebende de Tournay estoit nulle, & le Roy l'ayant conferee, par Arrest le Benefice fut adiugé au regaliste.

Doncques la regale estant ouuerte à Cahors le defendeur s'estant faict pouruoir par le Pape, le demandeur a estimé le benefice estre vacquant, & le treziesme Feurier mil six cens trente dedans les trois ans que la regale dure a obtenu prouision du Roy en vertu de laquelle ayant pris possession le vingt huit. Iuin mil six cens trente, il a faict assigner le defendeur au Parlement seul Iuge de la regale. Mais Maistre Anthoine de Vertamont estant venu à la trauerse qui a requis le mesme benefice pour l'indult auquel il estoit nommé, & pour ce que Messieurs du grand Conseil sont seuls iugés de l'indult, ayant faict assigner ledit Carbonnel au grand Conseil, & le demandeur y ayant esté assigné pour y venir contester, ledit demandeur fut obligé de se

pouruoir en reiglement de Iuges, & par l'Arrest l'affaire a esté retenuë audit Conseil, en vertu duquel Arrest le demandeur a produit les pieces qui suiuent.

Et pour iustifier par le demandeur comme il est bien fondé en la regale qu'il a pleu au Roy luy accorder, estant Clerc tonsuré & Baschellier en droict Canon a produit à cette fin deux pieces attachees ensemble.

La premiere est l'extraict des registres des insinuations Ecclesiastiques de l'Archeuesché de Paris, dans lesquelles l'acte de tonsuré dudit demandeur est inseré en datte du vingt sept. Mars mil six cens dix, ce qui montre deux choses : l'une sa qualité de tonsuré, l'autre que sa tonsure a esté insinuée dans le Greffe Ecclesiastique quoy que l'insinuation en matiere de regale ne soit point necessaire.

La seconde piece est le degré du demandeur de Baschellier en droict Canon en datte du troiesme Decembre mil six cens vingt-neuf insinué encores le septiesme Mars mil six cens trente, & sont lesdittes pieces cotees par, A,

Item, & pour monstrier comme le demandeur a esté pourueu du benefice contentieux a produit à cette fin cinq pieces attachees ensemble.

La premiere du tresiesme Feurier mil six cens trente, sont les prouisions en regale signees par vn Secretaire d'Estat, par lesquelles lettres il apert le Roy auoir conferé en regale audit demandeur l'Archidiaconé contentieux.

La seconde est vne procuration passée par ledit demandeur le vingt cinquiesme May mil six cens trente pour prendre possession dudit Archidiaconé en consequence des prouisions en regale.

La troiesme est vne requeste presentee au Parlement de Tholouse le vingt cinq. Iuin mil six cens trente tendante à ce qu'il fust enjoint à vn Notaire de Bordeaux d'assister, & de donner acte de la prise de possession dudit demandeur, tous les officiers de Cahors estans refusans de l'assister.

La quatriesme est vn Arrest de ladite Cour de Parlement de Tholouse du vingt cinq. Iuin de ladite annee mil six cens trente, par lequel il est enjoint aux Notaires de Tholouse de receuoir les actes requis & necessaires pour ladite prise de possession.

La

La cinquiesme & derniere desdittes pieces est l'acte de prise de possession du vingt huiet Iuin mil six cens trente signé Cicard Notaire audit Tholouse en consequence & en execution dudit Arrest, & sont lesdittes pieces cotees par B.

Item, & pour monstrier de l'ordre des proceddures qui ont esté faictes pour paruenir à faire iuger ladite regale ouuerte a produict à cette fin quatre pieces attachees ensemble.

La premiere est vne commission de la Cour de Parlement de Paris du quatriesme Aupil mil six cens trente aux fins de faire assigner Carbonnel defendeur comme pretendan droit au benefice contentieux, au dos de laquelle commission est l'assignation donnee audit Carbonnel le vingt huietiesme May de ladite annee mil six cens trente pour comparoir au Parlement de Paris pour defendre à ladite regale.

La seconde est vn *Pareatis* du neuuiesme Aupil mil six cens & trente pour mettre ladite commission à execution.

La troisieme est vn Arrest de ladite Cour de Parlement de Paris, du seziesme Decembre mil six cens & trente, par lequel il apert que le demandeur a conclud en sa regale, a requis en cas de contestation l'estat, & pour ce que le defendeur estoit hors du ressort du Parlement de Paris il est ordonné qu'il viendra defendre à deux moys.

La quatriesme & derniere est l'Arrest du Conseil du vingt vn Aoust mil six cens trente vn portant retention de cause signé Quiquebeuf, & sont lesdittes pieces cotees par C.

Item, & pour monstrier que l'Euesché de Cahors est subiet à la regale comme tous les autres Eueschez de ce Royaume a produit vn Arrest du Parlement de Paris, du vingt quatre Aupil mil six cens huit pour l'Euesché de Bellay par lequel sur les conclusions de Monsieur l'Aduocat General Seruin, la Cour a iugé le Roy auoir droit de regale en l'Eglise saint Iean de Bellay, comme en tous les autres Eueschez de son Royaume, & faict inhibitions & defenses à tous Aduocats & Procureurs de tenir propositions au contraire, par lequel Arrest, ensemble par le plaidoyé de Monsieur Seruin qui y est inseré, il se veoit que le Roy est fondé vniuersellement de pretendre la regale en tous les Eueschez de ce Royaume sinon en ceux qui sont fondez en exemption à titre onereux, & qui raportent le titre de leur

Deficit,
& est en
la pro-
duction
des defen-
deurs.

exemption. Si bien que Cahors ne iustificiant point d'aucune exemption vallable pour la regale spirituelle, il s'ensuit qu'elle doit auoir lieu, & qu'elle ne peut estre disputee. Car s'il est vray que lon a iugé que la regale auoit lieu à Bellay qui est de nouveau vny à la Couronne, & auquel Euesché lon n'auoit iamais sceu que s'estoit que de regale, les Ducs de Sauoye ne l'ayans iamais pretenduë, à plus forte raison Cahors qui de tout temps & ancienneté & de reigne du Roy Clouis, est entré soubs l'adomination des Roys de France, & principalement encores quand lon considere que les Euesques de Cahors ne possèdent leur Comté & leur domaine que par la maniffissance & liberalité des Roys de France. Si donc la regale est deuë au Roy, ce doit estre en l'Euesché de Cahors pluſtoſt qu'en aucun autre Euesché de ce Royaume, puis que par le pariage faict avec Philippes III. Roy de France, le Roy partage avec l'Euesque le domaine de l'Euesché, & par sa mort doit jouir de tout comme estant le seul protecteur de l'Euesque & de son domaine, & est ledit Arrest de Bellay cotté par D.

Item, & pour monſtrer que le priuilege que pretend auoir l'Eglise de Cahors n'est qu'imaginaire, & que sur icelluy le Roy ne peut perdre son droit auguste de regale, aproduict à cette fin deux pieces attachees ensemble.

Ce regi-
ſtre est in-
ſeré dans
le liure de
Monsieur
le Mai-
ſtre au
ſeuillet
112.

La premiere est l'employ d'un registre que lon dict estre en la chambre des Comptes au registre cotté par ces mots *qui es in cœlis*, par lequel il est dict que le Roy a droit de regale dans l'Archeuesché de Bourges, excepté Limoges & Cahors: par lesquels termes les defendeurs veulent induire que le Roy luy meſme a recogneu n'auoir point de droit de regale à Cahors, mais l'on à cy dessus ſuffiſamment faict veoir que ce registre n'estoit pas considerable, ſi l'on n'en raportoit le titre: que ce n'estoit pas assez que dans vn expositif Cahors paſſaſt pour exempt s'il estoit vray qu'en effect il n'eust point d'exemption.

La ſeconde piece est le traitté de Monsieur le Maiſtre en la page cent treize & cent quatorze, ou expliquant ce registre dict en premier lieu qu'il ne doit estre entendu que de la regale temporelle & non pas de la ſpirituelle, & en ſecond lieu qu'il ne faut point adjoſter de foy à ce registre, pour ce qu'il n'est pas veritable & finit par là.

Que s'il est vray que Monsieur le Maistre que lon sçait auoir esté legitime defendeur des droicts du Roy le plus entendu de ceux de son temps pour le faict des regales aye recogneu la fausseté de ce registre lon ne doit point aujourd'huy s'y arrester, & y auoir esgard ne raportant point les titres de l'exemption sur lesquels il semble que ce registre aye esté fondé. Et sont lesdittes pieces cotees par, D, bis.

Item, & pour monstrier que ce registre ne peut estre entendu que de la regale temporelle & non point de la spirituelle produict trois pieces attachees ensemble.

La premiere est l'employ dudit registre de la chambre des Comptes, par lequel tout au commencement il est dict que, *Dominus rex prout constat per antiqua scripta camera consuevit capere regaliā cum vacauerit*, par lesquels mots *capere regaliā*, il s'ensuit que le registre n'entend parler que de la regale temporelle: puis que pour la spirituelle le Roy ne prend point la regale, mais il la donne. *Produce
sous la
cotte pre-
cedente.*

Et au quatriesme article suiuant du mesme registre, il est dict, *Verum de Pictauiensi fuit computatum anno 206*. Et par ces mots, *fuit computatum*, il est tres-clair que lon n'entend parler que de la regale temporelle dont lon compte à la chābre des Comptes: & par consequent d'en tirer argument pour la spirituelle contre les droicts du Roy sans en raporter de titre, c'est combattre les maximes les plus ordinaires & les plus certaines.

La seconde piece est l'extraict d'un liure intitulé *Series & acta Episcoporum Cadurcensium*, où il se veoit en la page 138. que les Collecteurs des regales en l'an 1279. ayant faisi le reuenu de l'Euesché le siege vacquant, le Roy Philippes IIII. en accorda la main leuee à cause de la concession qu'ils disent auoir du droict temporel de la regale du Roy Philippes II. surnommé Auguste, & par lesdittes lettres patentes il apert que la concession estoit pour la regale temporelle & non pas pour la spirituelle, car il n'en est parlé en aucune façon. D'où il s'ensuit que ce qu'a dict Monsieur le Maistre, que ce registre doit estre entendu de la regale temporelle seulement, est veritable, puis que l'Eglise de Cahors n'a de pretendus priuileges que pour la temporelle seulement.

La troiesme & derniere desdittes pieces en vne Bulle d'Inno

cent quatre adressante à l'Euesque de Cahors du mois de Février mil deux cēs cinquāte, par laquelle il apert que le chapitre de l'Eglise de Cahors iusques alors n'auoit esté cōposé que de reguliers & qu'ils feurent secularisez par cette bulle, où du moins que lon donna le pouuoir à leur Euesque de les seculariser. De laquelle piece il s'ensuit qu'en l'an mil cent quatre vingts dix-sept que lon pretend, que Philippes a exempté de la regale l'Eglise de Cahors, ce ne pouuoit estre que de la temporelle puis que lors n'y ayant n'y prebendes ny dignitez en leur Eglise estant toute pleine de Religieux, il n'y auoit point encores de regale spirituelle, & par consequent lon ne peut pas dire qu'on les aye exemptez d'un droit que lon ne cognoissoit point en la Prouince à cause qu'il n'y auoit point de benefices qui y fussent subjets: car la secularisation estant de l'an mil deux cens cinquante, elle estoit apres le pretendu priuilege d'exemption & sont lesdittes pieces cotrees par E.

Item, Et pour monstrier que le registre qui est en la chābre des Comptes est faux & que lon n'y doit point auoir d'esgard, suivant la doctrine & l'aduis de monsieur le Maistre: produit à cette fin le demandeur deux pieces attachees ensemble.

*Produit
sous la
cotte D,
bis.*

La premiere, est l'employ de l'extraict dudit registre, dans lequel il se void que tout l'Archeuesché de Bourges est exempt de la regale à l'exception de Limoges & Cahors. Donc il est vray que Cahors n'est pas plus exempt que Limoges.

La seconde piece est vn Arrest du Parlement d'Octobre en la Feste de Toussaincts en l'an mil deux cens soixante & douze, tiré du registre *olim*, au fueillet soixante & seize, par lequel Arrest il se void que le Roy a droit de regale en l'Euesché de Limoges. Car apres la mort de l'Euesque le Seneschal de Perigueux ayant fait saisir tout le domaine de l'Euesché à cause du droit de regale: entre les biens saisis il se trouua deux mestairies qu'un Seigneur voisin vendiqua comme à luy appartenant; & ayant iustifié que ses mestairies n'estoient point du domaine de l'Euesque, main-leuee luy en fut faite: d'où on induit que la regale auoit lieu à Limoges, puis que lon en demeure d'accord par les termes de l'Arrest, & que la distraction des mestairies n'est demandee que pour ce que les biens n'estoient point du domaine de l'Euesque; car si le Roy n'eust point eu droit de regale

gale en l'Euesché de Limoges, le Seneschal de Perigueux n'eust point fait saisir, & ce Seigneur voisin n'eust point esté obligé de iustifier le droict de propriété qu'il auoit dans lesdites mestairies, & n'eust fallu autre chose sinon de soustenir que le Roy n'auoit point droict de regale. Et sont lesdites pieces cotees par F.

Item, Et pour d'abondant monstrier que ce pretendu registre n'est pas veritable, a produict à cette fin quatre pieces attachees ensemble.

La premiere est l'employ dudit registre, où il se void que l'Archeuesché de Tours est sujet à la regale à l'exception de ses Suffragans de Bretagne: Et neantmoins il est tres-constant que lesdites Eueschez de Bretagne sont sujets à la regale. Ce qui monstre que lon ne doit point s'arrester ny faire fondement sur ledit registre.

*Cy-des-
sus pro-
duit sous
la cote
D. bis.*

La seconde piece est vn Arrest du vingt-troisiesme Decembre mil cinq cens quatre-vingt dixhuiet, par lequel Messire Philippes du Becq Euesque de Nantes auroit esté condamné vers les Tresoriers, Chanoines & Chapitre pour le payemēt dudit droict de regale, quoy que la Bretagne se fust tousiours pretendue exemptte, & que iusques à lors il ne se remarquaist point que le Roy l'eust iamais leuee. Ce qui monstre comme ce droict est imprescriptible, & qu'il ne se peut perdre par le temps.

La troisieme est copie d'un Arrest du dixneufiesme Mars mil fix cens cinq, par lequel à faute d'auoir par l'Euesque de Vannes fait son serment de fidelité, vne Prebende de l'Eglise de Vannes fut declaree vacante en regale & adiugee au regaliste, quoy que ce fust en Bretagne, où la regale spirituelle n'auoit iusques à lors esté iugee: & ne se trouue point qu'auparauāt ledit temps il y aye iamais eu de prouisions en regale accordées par le Roy d'aucuns benefices dependans de la Bretagne: ce qui monstre (comme la piece precedente) que la Bretagne contre les termes du registre est sujette à la regale temporelle & spirituelle; & d'ailleurs quoy que la regale n'eust iamais esté pratiquee en Bretagne, le Roy ne perd point ses droicts pour cela, & la prescription n'est pas considerable quand il s'agist des droicts de la Couronne.

La quatrieme & derniere est vn autre Arrest du 18. Auiil mil fix cēs vingt-quatre pour vne Prebende de l'Eglise cathedrale de Leō en Bretagne, qui fut adiugee au regaliste par le defect d'enre-

gistrement du sermēt de fidelité de l'Euesque de Leō: Ce qui sert encores pour monstrier aux mesmes fins cōme toute la Bretagne indistinctement est aujourd'huy subiette aux droicts de la regale temporelle & spirituelle, quoy qu'elle s'en fust tousiours presumee exempte, pource que ce droict n'auoit point esté esclairey dans cette prouince, & que lon y auoit ignoré les droicts du Roy: d'où le demandeur tire cette consequence, que si le registre ne se trouue pas veritable pour l'Archeuesché de Tours, lon ne s'en peut pas seruir pour l'Archeuesché de Bourges, puis qu'il y aura pareille raison de méprise en l'un qu'en l'autre: veu mesmes que desia il dict que Limoges n'est point subject à la regale: & neantmoins le demandeur a produit l'Arrest de l'an mil deux cens soixante & douze, par lequel il appert qu'il y est sujet, ainsi qu'il a esté monstéré cy-dessus.

Seruent encores lesdites pieces pour monstrier qu'encores qu'en la Bretagne lon ne sceust que c'estoit que regale, & qu'elle n'y eust eu iamais lieu: neantmoins pource que les droicts du Roy sont imprescriptibles & ne se peuuent perdre, *per non usum*, ainsi que lon a iugé par lesdits Arrests: Par consequent encores que ledit demandeur ne iustifie pas que la regale spirituelle ayt eu lieu à Cahors, le Roy ne peut perdre son droict: & aujourd'huy que ce poinct est controuersé, lon ne peut pas alleguer la prescription, puis que ce fleuron Auguste de la Couronne est imprescriptible. Et sont lesdites pieces cotees par G.

Item, & pour monstrier comme la regale est non-seulement imprescriptible: mais mesmes qu'elle est incessible, & que notwithstanding les priuileges & exemptions, la Cour n'a pas laissé de iuger que la regale auoit lieu, & que l'exemption n'estoit considerable que pour le regne de celuy qui l'auoit donnée: a produit à cette fin trois pieces attachees ensemble.

La premiere, sont les lettres patentes du Roy Louis VII. surnommé le Jeune, expediees *vacante cancellaria*, de l'an mil trente-sept en faueur de l'Archeuesque de Bourdeaux & de son Suffragāt: par lesquelles lettres il apert qu'en consideration du mariage fait avec la fille de Guillaume Comte de Guienne, qui auoit esté conclud & arresté par l'Archeuesque de Bourdeaux, le Roy luy accorda l'exemption de la regale, tant pour luy que pour ses Suffragans.

La seconde du trentiesme Iuillet mil cinq cens quatre-vingts seize est vn Arrest rendu au Parlement de Paris entre le nommé par le Roy à l'Archeuesché de Bourdeaux : Monsieur le Procureur General en son Parlement de Paris, & les Tresoriers & Chanoines de la Sainte Chapelle; par lequel Arrest l'Archeuesque de Bourdeaux est declaré sujet à la regale comme les autres Archeueschez & Eueschez du Royaume, & est Messire Iean le Brethon nommé par le Roy, condamné de payer le droict de regale à la Sainte Chapelle de Paris, iusques à ce qu'il sera pourueu en Cour de Rome, fait le serment de fidelité, & pris possession actuelle dudit Archeuesché.

La troisieme, est vn Arrest dudit Parlement de Paris du dix-neufiesme Mars mil six cens sept, pour vne Chanterie & Prebende en l'Eglise de Saint Pierre d'Angoulesme, qui est vn des Suffragans de Bourdeaux, quoy que le defendeur en regale eust allegué l'exemption du Roy Louis le Jeune : Neantmoins sur les conclusions de Monsieur l'Aduocat General le Bret, qui soutint que la regale estoit vn droict de la Couronne domanial & vniuersel qui s'estendoit par tout, que l'exemption alleguee estoit vray-semblablement reuoquee, & n'auoit lieu tel priuilege qu'entend qu'il estoit continué par les successeurs Roys, contre lesquels il n'y a point de prescription, comme il a esté iugé en l'Euesché de Nantes, Tulles & autres. La Cour par son Arrest sur lesdites conclusions declara qu'Angoulesme estoit sujet à la regale, & adiugea le Benefice au regaliste.

Seruent lesdittes pieces pour monstrier que le droict de la regale ne se peut ceder : que si le Roy veut donner ses droicts il le peut pour le temps de son reigne pour le regard de la temporelle seulement, car pour la spirituelle, il sera monstrier si apres qu'il ne le peut pas. Tellement que de vouloir par les defendeurs pretendre vne exemption pour Cahors sans en rapporter les titres & priuileges, c'est contre la doctrine des Arrests puis que quand ils rapporteroient lesdits titres & exemptions ils ne seroient pas considerables. Ainsi qu'il a esté iugé pour Bordeaux & Angoulesme & sont lesdittes pieces cottees par H.

Item, & pour monstrier d'abondant comme les pretendus priuileges que lon a tirez anciennement des Roys ne sont pas considerables pour le faict de la regale, a produit à cette fin trois

pieces attachees ensemble.

La premiere sont les lettres patentes de l'an mil deux cens trois du Roy Philippes Auguste par lesquelles il accorde l'exemption de la regale à l'Euesque de Langres.

La seconde est vn factum des Tresoriers, Chanoines & chapitre de l'Eglise de Paris, au procès qu'ils auoient contre l'Euesque & chapitre de Langres pour le droit de regale, dans lequel factum il se veoit par forme d'objection les moyens & raisons dudit chapitre de Langres & les responces qui y feurent apportees.

La troisieme & derniere est vn Arrest de la Cour de Parlement par lequel nonobstant ledit Priuilege la Cour iugea l'Euesché de Langres estre sujet à la regale, ledict Arrest est en datte du

Lesquelles pieces seruent pour monstrier & faire veoir la nullité de tous ses priuileges, & que l'on a tousiours faict distinction entre les exemptions accordees à titre onereux comme au chapitre d'Auxerre & les exēptions, qui ne procedent que de la liberalité du Prince. Pour les premieres, elles ont tousiours esté confirmees par les Arrests, d'autant que le Roy estant en possession & jouissant pleinement & paisiblement de ce qui luy est accordé par cet eschange de ladite exemption il est garend & doit faire iouir ceux avec lesquels ses predecesseurs ont traitté du droit à eux accordé: mais quand l'exemption n'a pour fondement que la grace du Prince quand il est question de la regale temporelle l'exemption n'est que pour le reigne de celuy qui l'a accordee, & si à tous nouueaux auenemens à la Couronne les pretendus exempts ne prennent lettres de confirmation leur priuilege est destruit & aboly, & sont lesdittes pieces cotees par I.

Item, & pour monstrier comme en la regale spirituelle, la concession mesme faicte par le Roy de son viuant ne subsiste pas, & qu'on la iuge non considerable, *a produit vn Arrest du premier Iuillet* mil cinq cens quatre vingts dix-neuf rendu entre Maistre Louys de Mouchal, pourueu par le Roy de la prebende & chanoinie Doruille en l'Eglise Cathedrale de Constans demandeur en regale, & Maistre Charles de Boüillons aussi pourueu en regale. Entre ses deux regalistes Mouchal estoit pourueu par le
 Roy

Roy purement & simplement, & Maistre Charles de Boüillons estoit aussi pourueu par le Roy en regale, mais à la nomination de Messire Nicolas de Borion nommé par le Roy à l'Euesché de Constance. Quoy que Boüillons fust le premier pourueu: neantmoins ayant esté iustifié que ses prouisions procedoient en consequence de la concession que le Roy auoit faicte au nommé à l'Euesché de conferer en regale tous ceux qui luy feroient par luy presentez, sur les conclusions de Monsieur l'Aduocat general Marion, lon declara les prouisions en regale obtenues à la nomination des nommez aux Archeueschez & Eueschez nulles & de nule effect & valleur, par cette consideration que le Roy n'auoit peu ceder son droict de regale spirituelle auparauant que le benefice fust vaquant, & que lesdittes cessions & graces accordees aux nommez estoient nulles, quoy que ce fust du reigne & du temps de celuy qui auoit accordé le priuilege. Et sont lesdittes pieces cotees par, K.

Item, & pour monstrier cōme les Euesques du Languedoc sont subjets à la regale, & qu'ils ne se pretendent point exēpts, encores que par le Cahier des doleāces du pais du Languedoc lon leur ayt faict dire qu'ils estoient exempts du droict de regale, *a produict à cette fin le Contract & traitté faict par Messire Jean d'Asfiet Euesque de Lombès*, avec les Thresoriers, Chanoines & chapitre de la saincte Chappelle de Paris le vingt sept. Decembre mil six cens vingt huiet, par laquelle piece il apert que ledit Euesque de Lombès a recogneu son Euesché auoir tombé en regale depuis le deceds de son Oncle, & pour cēt effect composé des fruiets dudict Euesché & les auoir racheté des Thresoriers, Chanoines & chapitre auxquels ils appartennoient. Ce qui monstre que la plainte que lon dict auoir esté faicte par les Estats de la Prouince n'est qu'un artifice pour tascher de tirer vne exemption de laquelle ils n'ont nuls titres ny nulle preuue. Aussi iudicieusement il leur auroit esté respondu que le Roy entendoit que les beneficiers & Ecclesiastiques de la Prouince continuaissent à jouir des droicts & priuileges qui leurs auoient esté accordez par les Roys ses predecesseurs, mesmes suiuant l'Edict de l'an mil six cens six. Tellement que pour se pretendre exempt suiuant & au desir de la responce audit cahier, il faut iustifier d'un titre d'exemption, ce que ne representāt point, il s'ensuit que la regale

a lieu à Cahors, & sont lesdittes pieces cotees par, L.

Item, & pour monstrier comme il ne suffist pas pour clorre & fermer la regale de faire le serment de fidelité, mais qu'il faut que ce serment soit enregistré en la chambre des Comptes, & pour cét effect que lon obtienne lettres patentes du Roy y adressantes, qu'il y ayt Arrest de main leuée de ladite chambre, & que cét Arrest soit enregistré en la Iustice royale des lieux, cessant quoy, la regale dure tousiours en vn Euesché, a produit à cette fin six pieces attachées ensemble.

La premiere est l'Ordonnance *Dum Episcopus*, qui est cette Ordonnance celebre qui reigle le faict de la regale, enregistrée en la chambre des Comptes de Paris au registre cote B, folio 53. 54. & 55. Par laquelle il est dict que *Regalia dicitur vigere & habere locum in Episcopatu donec & quousque futurus successor legitimè intrans suum debitum fidelitatis iuramentum dicto Domino nostro regi, prout tenetur, fecerit: quodque litera regia attestantes dictum iuramentum sic fuisse factum presentata, registrata & expedita fuerint in camera computorum: & quod receptor seu commissus ad receptam ipsius regalia receperit mandatum à dicta camera emanatum per quod mandetur quod leuet manum regis, & permittat dictum Episcopum uti, & gaudere ponendo ipsam temporalitatem ad plenam deliberantiam: nec ante receptionem huiusmodi mandati à dicto receptore reputatur dicta regalia clausa, sed usque ad diem ipsius receptionis confert rex beneficia tanquam in regalia vacantia.* Par lesquels termes il se voit que ce n'est pas le seul serment de fidelité qui ferme la regale, mais qu'elle demeure ouuerte iusques à ce que l'Arrest de main leuée de la chambre des Comptes soit signifié au Receueur du Domaine.

La seconde piece est l'extraict du premier article du cinquante-huictiesme priuilege de Monsieur Ruzé qui a traitté *ex professo* du droict des regales: par lequel il se veoit que ce n'est pas assez d'auoir obtenu Arrest de main-leuée de la chambre des Comptes. Il dict que la regale dure tousiours iusques à ce quelle soit signifiée & venue à la cognoissance des Officiers royaux des lieux.

La troiesme est vn extraict de la question cinquante trois de *Probus* qui a aussi traitté *ex professo* du droict de regale, ou il rapporte la forme des lettres patentes pour clorre la regale du troi-

siesme Decembre mil trois cens soixante sept. Par lesquelles lettres patentes il se veoit que pour fermer la regale, il faut que l'Arrest de main-leuee de la chambre des Comptes soit signifié ou au recepueur du Domaine, ou aux Officiers royaux des lieux.

La quatriesme est le liure composé par Messire Gilles le Maître premier President audit Parlement de Paris, dans lequel liure au chapitre cinquiesme, page cent trente-trois, il resout affirmatiuement que la regale ne peut estre dite fermee iusques à ce que l'Arrest de la chambre des Comptes portant main-leuee soit notifié aux Iuges royaux des lieux, ou au recepueur du Domaine.

La cinquiesme est vn Arrest du trente Iuillet mil cinq cens quatre vingts seize cy deuant produit, par lequel la Cour de Parlement de Paris eniugeant l'Archeuesché de Bordeaux estre subiet au droict de regale, adjuje les fruiets de l'Archeuesché à la sainte chappelle iusques à ce que l'Archeuesque aura obtenu ses Bulles en Cour de Rome, faict le serment de fidelité & pris possession actuelle du dict Archeuesché, ce qui ne peut estre qu'apres la main-leuee de la chambre des Comptes, & la signification aux Officiers des lieux.

La sixiesme & derniere est vn autre Arrest du dix-huict Auiril mil six cens vingt quatre pour l'Euesché de Leon cy dessus produit, par lequel quoy que l'Euesque de Leon eust faict le serment de fidelité, faute de l'auoir faict enregistrer en la chambre des Comptes de Paris, obtenu main-leuee & l'auoir faict signifier aux Officiers des lieux, il fut iugé y auoir ouuerture en regale.

Toutes lesquelles pieces seruent pour monstrier que quoy que Monsieur l'Euesque de Cahors ayt dès l'annee mil six cens vingt cinq faict le serment de fidelité, neantmoins ne l'ayant point enregistré en la chambre des Comptes de Paris & obtenu main-leuee, la regale ne peut estre ditte fermee à Cahors. Et sont lesdittes pieces cotees par, L.

Item, & pour monstrier que l'Arrest pour la penitencerie d'Angers du vnziesme Auiril mil six cens vingt huict, n'est pas considerable & ne peut faire de prejugé au different qui se presente, que ce qui est enoncé par vn vice de Greffier qui à mal es-

*Cy-dessus
produit
sous la
cotte D.
bis.*

*Cy-dessus
produit
sous la
cotte F.
2. piece.*

*Cy-dessus
produit
sous la
cotte G.
4. piece.*

crit ce qui auoit esté dict n'est pas veritable, a produit à cette fin deux pieces attachees ensemble.

*Produit
en la pro-
duction
de Car-
bonel.*

La premiere est copie de l'Arrest obtenu par Maistre René Auger Penitencier d'Angers le vnziesme Aupil mil six cens vingt huit, par lequel il se veoit que le Greffier qui a redigé ledit Arrest à inferé audit plaidoyé que feu M^r Miron auoit obmis de faire enregistrer son serment de fidelité en la chambre des Comptes, encores qu'il soit vray que son serment de fidelité eust esté enregistré des l'an mil cinq cens quatre vingts huit, enquoy paroist le peu de foy que lon peut apporter audit Arrest par le faict de celui qui l'a recueilly.

Sert encores cette piece pour monstrier que monsieur Miron auoit ioüy de l'Euesché d'Angers plus de trois ans paisiblement lors de la prouision dudit Auger: par consequent qu'il estoit possesseur triennal, & qu'il pouuoit ioüy de la grace de l'Edict de l'an mil six cens six, au lieu que Monsieur de Cahors lors de la prouision de Carbonnel defendeur n'estoit possesseur que de deux ans; & par consequent quand lon prendroit cet Arrest à la lettre & dans les termes ausquels il est conceu & couché, il se trouueroit que les defendeurs se feroient méconter, & que tousiours il y auroit ouuerture en regale, puis que Monsieur de Cahors n'estoit point triennal possesseur.

La seconde piece est l'Arrest de la Chambre des Cōptes, obtenu par mōsieur Miron en l'an mil cinq cens quatre-vingts huit, par lequel apert que monsieur Miron ayant fait le serment de fidelité pour l'Euesché d'Angers, a fait enregistrer ledit serment de fidelité en la chambre des Comptes, obtenu main-leuee de la-ditte chambre, laquelle il a fait signifier aux Officiers Royaux des lieux. Il est donc vray de dire que Monsieur Miron a satisfait à la Philippine pour l'Euesché d'Angers, & par consequent que cet Arrest de l'an mil six cens vingt huit ne peut seruir dans l'hypothese qui se presente ayant esté donné dans vne autre contestation. Et sont lesdittes deux pieces cotees par, M.

Item, & pour monstrier les motifs sur lesquels ledit Arrest de la penitencerie d'Angers a esté rendu, & que ça esté sur le fondement qu'un Euesque ayant faict vne fois le serment de fidelité pour vn Euesché quelque chose qui arriue pour ledit Euesché l'Euesque ne peut estre tenu de renoueller ledit ser-

ment

ment, a produit à cette fin la copie d'un Arrest donné en l'Audience de la grand' Chambre le vingt vniesmeFeurier mil six cens vnze, par lequel Arrest fut Iugé qu'un nommé à l'Euesché de Constance ayant en vertu d'un Arrest du grand Conseil pris possession de son Euesché pendant les defenses d'aller à Rome pour cet effect ayant faict serment de fidelité entre les mains du Roy, enregistré son serment en la Chambre des Comptes, obtenu main-leuee & faict signifier le tout aux Officiers royaux des lieux, depuis la liberté ayant esté d'aller à Rome ayant obtenu des Bulles qu'il n'auoit point esté obligé en consequence de ses nouuelles prouisions de faire nouveau serment, ny les faire enregistrer, ny d'obtenir aucune main-leuee. Ainsi Monsieur Miron Euesque d'Angers ayant esté pourueu en quatre vingts & huiet dudit Euesché d'Angers, ayant satisfait à la Philippine, depuis en six cens quatorze ayant faict diuorce avec son Eglise, en six cens vingt deux, s'estant reconcilié avec elle & remis dans ledit Euesché qu'il auoit abandonné, il n'a point esté obligé de faire nouveau serment, & le premier qu'il auoit faict en quatre vingt & huiet estoit suffisant pour fermer la regale, & c'est ce que l'on a iugé par l'arrest de l'annee mil six cens vingt huiet suiuant ledit Arrest de laditte annee mil six cens vnze. Et sont lesdittes pieces cotees par, N.

Item, & pour monstrier comme le benefice contentieux est vacquant en regale a produit à cette fin deux pieces attachees ensemble.

La premiere est le serment de fidelité presté par Messire Pierre Habert Euesque le vingt-tiesme Auri mil six cens vingt cinq, qui monstre que dès ce iour là Monsieur l'Euesque de Cahors a paru vouloir estre Euesque de Cahors.

*Produit
en la pro-
duction
de Ver-
tament.*

La seconde du fixiesme Mars mil six cens vingt-sept est la procuration pour resigner passée par Maistre Anthoine Carbonnel au profit du defendeur son Nepueu de l'Archidiaconé contentieux. Par lesquelles pieces il paroist deux choses l'une que la resignation dudit Carbonnel estoit en Cour de Rome en vn temps auquel Messire Pierre Habert n'auoit point faict enregistrer son serment de fidelité, ny satisfait aux formalitez requises par la Philippine: la seconde que Monsieur Habert n'estoit point paisible triennal possesseur de son Euesché de Cahors, lors

*Produit
en la pro-
duction
de Car-
bonnel.*

& au tēps que ledit benefice a vaqué, car le serment de fidelité qui precede la prise de possession de l'Euesché estant du moys d'Auril mil six cens vingt cinq, & la procuration pour resigner passée par Anthoine Carbonnel qui a faict vaquer le benefice estant du moys de Mars mil six cens vingt sept, il s'ensuit qu'il n'y auoit de possession paisible qu'un an & vnze mois, & par consequent lon ne peut pas dire que lon soit aux termes de l'Arrest de la penitencerie d'Angers, mesmes dans les termes, auxquels il est conceu: puis que dans ledit Arrest il se veoit que la principale defense que lon dit auoir esté dicte par Auger defendeur en regale estoit que monsieur Miron ayant ioüy de l'Euesché cinq ans durant paisiblement sans faisie de son reuenü qu'il deuoit ioüir de la grace de l'Edict de l'an mil six cens six. Et sont lesdittes pieces cotees par, O.

Item, & pour monstrier que lors & au temps que le demandeur s'est faict pouruoir en regale ledit Carbonnel n'estoit point paisible possesseur de trois ans dudit Archidiaconé a produict deux pieces attachees ensemble.

*Produit
en la pro-
duction
de Car-
bonnel.*

La premiere est la prise de possession dudit defendeur dudit Archidiaconé en datte du seiziesme Nouembre mil six cens vingt-sept.

*Cy dessus
produit
sous la
cotte, B.*

La seconde sont les prouisions en regale dudit demandeur du treze Feurier mil six cens trente, & ce veoit que le defendeur n'a de possession que deux ans deux mois, & par consequent les affaires sont aux termes du droict commun, & n'y a ny fin de non receuoir n'y prescription que lon puisse objecter au demandeur, & sont lesdittes pieces cotees par, P.

Tellement que par l'autorité de toutes ces pieces produites il se peut colliger que Cahors n'a aucune raison ny priuilege, pour s'exempter du droict de regale, & ne faut point considerer si le Roy a desia autresfois exercé sa grace sur ledit Euesché pour ce que le demandeur estant simple particulier il ne peut pas sçauoir ce fait là & en auoir la preuue, principalement n'estant point du pais, & n'ayant poinct demeuré sur les lieux. Mais ce poinct est inutile à examiner: puis que le Roy ne perd poinct son droict pour n'auoir esté requis, la regale comme dict est, est imprescriptible & incessible, & partant le demandeur n'espere pas que le Roy dans son Conseil ne perde

vn droict si auguste, & si important qui doit faire loy pour toute la France, laquelle ne recognoissant qu'un Roy doit viure sous vne mesme loy, puis que ce droict de regale faict partie de la Couronne. Et faut estre mauuais serui-
teur du Roy, & de l'Estat, pour reuocquer en doute cette verité.



